

Jutgo Aşani Pas

Hasia nedebo tau sabo po

Te Jutgo e pasde aşani po tiwai si dwasianu te 2 Pitago aşani pas tiwai elalubao. Te bidi Jut aga da, te Jems aga ama da wabo, te po obaso dago koneagameo, aga te Jisasgo amanu dao. Tama te tibo po ola mabo bage augwalide te bidi Jutgo wado po weyu, tama augwaligo ebo dwai dwai kolesaga te Godigo wei ponaibao wabo po aşani. Tama te bidi Jutgo te Kraisgo po wali pabo we bidi te Krais ma asobo sogo bugagia tonaluo po weyu, tama Godigo augwali tau saibao wabo po pusali. Te tiwai po te ves 3, tede elalubao.

Dagego te duga konealubo homu daş wabo bugagia tonalu tama te dwagi yai buku po dali boi bidi ebo bidi dabego po sela şayşo

¹Ena Jut da, ena te Jisas Krais agai şe ebo bidi da, tama ena Jems aga amanu dao. Tama eno e po dage Godigo i wali we bidibolo aşena tolobao. Tama God dago Aya agai dage dali dwagi yai homu eyu, tama godolo mu ebo dao. Tama Jisas Krais me agai dage palibo dao. Augwali sigo dage dali tama tiyu, tama dage bugagia bidibao.^a ²Te eno homugo Godigo agai homu dene eyu tau sabo kolesaga me, te dage homu nagamea ilabo kolesaga me, te agai dage dali dwagi yai homu eyu godolo ebo kolesaga me, te kolesaga sela dagebolo geninama mu pedalaibao, te eno te homu ebao.

Tibo po ola mabo bidi dabe pedalali

³⁻⁴Eno abagi mu dede, hasia eno homugo te Godigo da tigidali ma dobola sabo şede eno po dagebolo aşena tolabo homu bomo yai. Tiali goli, eno homu hasegelali, tama megi dagebolo gasagi yai po aşena tolobao. Magi baso meni, gasa bidi dabe augwali dage Godigo we bidi hani tomoba geme asai, te sa asobo bage tiwai asai. Te polobadu te deli sogo naga te God agai aga po te aga we bidibolo mu mawai dao.

^a 1:1 Mat 13:55; Mak 6:3

Tama te po e dao, te dago te God dali Jisas dali augwali side konealubo po daŋ wao. Tiali goli, te geme asai bagego augwaligo ebo dwai dwai kolesaga bolainogo augwaligo te Godigo mani po hasegelali, tama tibo po dagebolo ola mayu, “Woo, te God agai da olo tau siyu, tama dago ebo dwai seŋe sela şabaso, teda dago dwai dwai penani ebo kolesaga eyu da, te usu da,” augwaligo te tibo po ola mabo da. Tama tibaso, eno megi dagebolo e po aşena tolali, te dage bommo elama tama te Godigo mani po bugagia tonaluyu palişo, augwaligo te po dolidali weyu yao. Tama augwaligo te tobage tibo po weyu, augwaligo te Jisas Kraide hogwa sabo po wabo dao. Augwaligo dago Polalubo Bidi, te dago Genuai Bidi deli naga tudiba mubo dao. Tama polobadu mu Godigo po aşani bidi augwaligo te po aşani, te God agai te tobage dwai dwai se ebo bage sa munama tama seŋe mawaibao, te po te bukude aşani.

⁵Te Godigo polobadu mu yali se po te dagego gisiga koneai digi, eno dagego ma konealumainogo eyu e po ma obao. Polobadu agai te Israel bidi hani tau siyu, tama augwali kalabus togaluyu elama, tama Isip to tagalama odasa pai. Tiali goli nosali augwali meba agai wali poba augwa homu tigidalali musişwai, tama te po wali pisişbaso agai augwali doloyu ela silai.^b ⁶Tama te ensel mobo bidi meba me, augwalide ma kone palao. Te ensel mobo bidi meba augwaligo te Godigo augwaligo nogoba mani tonalubo bidi se hagela eyu, tama te se tagalali. Tama agai augwalibolo mani bidabo madi, te me augwali hagelama, tagalalio. Tama Godigo augwali dila pai aligabo bonogo nogo dunama, kalabus ilama, bida bida peyu bidibo, tama augwali te a bulu hulua sai digi tede mu daŋ olama bidibao. Tama augwali te a hulua sai digide bidiyu, tama augwali Godigo genuai bodolu sali te tonaluyu bidibadi, tama te moni po to ebo sogo pedalaibao.

⁷Te polobadu elaluali moni hanu si me, te nogi Sodom dali, Gomora dali, te hanu side pedalali dwai seŋe dagego ma konea palao. Tede bidali bage me, te hanu si şade elaluali dwasianu bulude bidali bage me, augwali tigidaligo te ensel mobo bidi mebago yali dwai dwai penani ebo se tiwai yali. Augwali penani se de bidaluali, tama augwaligo homu hodaloama, tama augwali te se bommo elama eyu pobeasa pali. Tama tibaso, Godigo augwali te moni sia te dagaludu tagala palali, tama augwali te siago ela silai. Tama dago augwalide te yali se şulama, tama dago koneai dao, te tobage dwai dwai se dago ilamuo, da te dene sidali weyu.^c

⁸Tama te dage tomoba geme duala şagaselama bidibo bidi dabe augwaligo me te tobage dwai dwai kolesaga ebo dao. Haniani na eyu, augwali homu hodoliyu, tama augwaligo meda yai kolesaga augwa

^b 1:5 Sai 12:51; Nam 14:29-30 ^c 1:7 Gag 19:1-24

tigide ebo dao. Tama augwaligo dago Genuai Bidigo augwali tonaluabo bomo sela sayu, tama augwaligo te Godigo dagalude bidibo ensel mobo bidi dabe dali me nogi posobo po wabo dao. Te ensel dabe augwaligo ula yai bomo elaluali goli, te bagego nogi posobo po augwalide widu gebao. ⁹Augwaligo te posobo po olamuo. Suao. Polobadu te ensel mobo bidi dabego polalubo ensel nogi Maikel, agai te dwai haubo mobo tuni bidi Satan dali augwali si po konila yai, te isai bidi Mosesgo tigi hagede konila yai. Tama te sogo Maikel agai te Satan dwai nogi posobo po me wabeo. Te meni. Agai Satanbolo te po wai, “Genuai Bidi aga digi nage osola sulama, tama sege mawaibao,” te po wai.^d ¹⁰Tiali goli te tibo po ola mabo bidi dabe augwaligo te page konesiawai naide te dwai posobo po wabo dao. Me ma, augwaligo te dwai seđe kuna koneani. Tama koneyu, te homu kolesaga meni yai bulu hasa tiwai bidiyu, tama augwaligo magi magi dwai se edubadi gebo dao, tama te tobage dwai kolesaga ebaso augwali mu dolama dene saibao. ¹¹Augwali hobedagia bidibao. Augwali te polobadu mu bidali dwai se yali bage tiwai ebo dao. Te polobadu bidali bidi nogi Kein, te Adam aga ogwa, te bidi aga pali dwai tu te augwali megi te tudu bilibo dao. Tama te dwai bidi me aga nogi Balam, agai yali se tiwai eyu, tama augwaligo masigi sabo pesa eyu, gasa we bidibolo dwai se yabo po hwa po mabo po wabo dao. Tama augwaligo te polobadu bidali bidi me nogi Kora agai yali se tiwai ebo dao. Te bidi Kora agai te Godigo wali po odobo hagela eyu, tama te po sela sabaso, nosali dene mu sai. Tama e bidi dabe me augwaligo te tobage po sela sabo kolesaga ebaso, tama augwali me mu doloyu hagawaibao.^e

¹²Te dage deliba sisinama, tama ‘Da deli hani dao,’ te homu eyu, dagego nai tubo dao. Awe, tiali goli te tibo po ola mabo bage augwali me te nai tubo madiba aselama, tama augwaligo dagego ebo kolesaga dolobo dao. Augwali te gudubo ugwa dwai meda ilibo nai tiwai dao. Augwaligo dage dali nai tubadi, te augwali wi isayu tama augwa hasi naga kisasa bidiyu, tama te nai tubode gasa we bidi tau sisayu, augwaligo te nai subigila tuyu ebo dao. Augwali te tulubage tulisawai po tiwai dao, tama waligo augwali pona palobaso tedela pabo dao. Tama augwali te ni aga du walobo sogo walisiawai ebo, te tobage ni tiwai dao. Tama augwali te page sasia pai ni tiwai dao, te bidigo te ni page guda sawai. Tama augwali te tiwai bidiyu, du walobeo, we bidi tau sabo se dwagi yai ebo menio. ¹³Tama te moni tamu ai bi dini wadolama nosali asiyu, tama te ai dinigo meda yai pesa hania pedalobo dao, te ai sanide. Tama te tiwai te bidi dabe augwaligo te hale ilibo kolesaga hania ebo dao. Augwali te dagalude elalubo ho meba tiwai dao. Te tobage ho osogo ula eyu, ma

^d 1:9 Bom 34:6; Dan 10:13, 21; 12:1; Sek 3:2; Ped 12:7 ^e 1:11 Gag 4:3-8; Nam 16:1-35; 22:1-35

sula siyu ebo hq dabe dao. Te hq pabo te bugagia dolo pabo menio. Tama Godigo te dwai sisi mu a bulu hulua sai digi sisi yai elalubo, tama te tibo po ola mabo bidi augwali te hulua sai bulude sesemane sogo bidada peyu, bidada paibao.

¹⁴Te polobadu bidi Adam aga ogwago ogwa tama nedada peyu, te nogo a olama me badu nogo deli wali, te bidi mego ogwa te Inok da, aga polobadu mu bidai bidi dao. Tiali goli, agai te sogo polobadu te megı bidibo tibo po ola mabo bagede te po wai, “Suao, Genuai Bidi aga ensel mobo bidi umabo mu dali asaibao.^f ¹⁵Tama aselama, tama agai te we bidi tigidali osola sueibao. Tama osola sulama, agai augwaligo aga tudiba muani bidi tebolo augwaligo seęę hania ola mawaibao. Tama augwaligo Godigo po oda tagalama te dwai seę eyu, tama te God tagalali bagego dwai sesena pai nogi posobo po agade odu geai. Tama te yali seę tigidali me, te wali dwai po tigidali me wei ponoyu, tama Godigo augwali dene mawaibao,” te bidi Inok agai te po polobadu wai.

¹⁶Te dage tomode bidibo tibo po ola mabo bidi dabe, augwali te tigidali pedalobo naide hagela homu eyu, tama sesemane sogo augwaligo gasa we bidide dwai homu naga ebo dao. Tama augwaligo tigo ebo kolesaga hodolama, tama augwaligo te kolesaga naga wali pabo dao. Augwaligo genuai po weyu, tama augwa nogi augwaligo ugwaba sabo dao. Te gasa we bidi dabebolo augwaligo po mumubo po weyu, tama te bagego nai dabede pesę elama sabo dao.

**Te dago konealubo po daę homu dagego
elalumainu eyu, te bugagia suao po wai**

¹⁷Te bidi dabe augwaligo te dwai seę yali goli, dage da, dage abagi dabe mu, te dago Genuai Bidi Jisas Kraıs agai po sela pabo bidi dabego dagebolo polobadu pusali po te dagego te po ma koneao. ¹⁸Te seę pedelasiqbadi tama augwaligo dagebolo te po wai, “Te nosali te tq dali, dagalu dali si silibo sogo te paęa yagasobadi, tama bidi mebago Godigo da ola mabo wiegi yai doloba pai kolesagade gısugu wagasobo bidi dabe pedalaibao. Tama augwaligo Godigo po tudiba muyu, tama bomu eyu, augwa tigo tde ebo dwai dwai kolesaga naga wali paibao,” te po augwaligo wai dao.^g ¹⁹Te tiwai asobo bidi dabe augwaligo dage Godigo po wali pabo we bidi hani tomode si pedebo bage dao. Tama augwaligo e tde ebo kolesaga naga wali peyu, tama Godigo Mobo Bidi agai augwali dali hodobo bidibo menio, te mu dao. ²⁰Tiali goli dage abagi dabe mu, dagego te Godide konealubo po bugagia daę olama, tama bidigo aga be bugagia seę ebogia tama duga digi duga homu kolesaga daę olama te seęde bomu yao. Te konealubo po te gasagi yai tedali mu dao. Tama te Godigo

^f 1:14 Gag 5:18, 21-24 ^g 1:18 2 Pi 3:3

Mobo Bidigo dage te gedu haluasa po wabo tau siyu, tama dagego te po sesemane sogo bugagia daꝋ weyu yao. ²¹Tama God agai dage dali dwagi yai homu eyu godolo mu ebo dao. Tama tibaso, dage duga ebo kolesagade bugagia tonaluyu tama dage aga paꝋde mu bidalua. Tama tiyu, te dago Genuai Bidi Jisas Kraiss dagego tonalua, te agai dage dali homu dene eyu, tau siyu elama tama agai te dagebolo te bidada peyu, bidada pabo ula mabo sogo te dagego bugagia tonaluyu bidiꝋo.

²²Te dage tomode te we bidi meba augwaligo te tibo po ola mabo bagego wabo po odama, tama megi augwali te Godigo pode homu si ebo dao. Tama tibaso, dagego augwali dali homu dene eyu, tama tau somainogo te augwalibolo te homu bega sabo po wao. ²³We bidi mebago te dwai dwai se ebo kolesaga ma gagalama, tama augwali te sia tomoba tuloluali bidi tiwai da. Tama tibaso, augwali te moni sia dabo buluba nosali pidali weyu, dagego augwali polo tau siyu ma sao. Te we bidi meba gasagi yai dao. Augwaligo augwa tigigo toꝋde ebo dwai dwai kolesaga naga wali pobaso, dagego augwali dali homu dene eyu tau sao. Tialima, dagego augwaligo ebo dwai kolesaga wai selama gagaidali weyu dage dua eyu, wi yao. Augwaligo dwai dwai kolesaga ebogo augwaligo gudubo ugwa dabe meda ilali. Te ugwade me dage boi bidi homu mu eyu yao. Tiali goli te hobedagia bidibo we bidi tau sao.

²⁴Te God agai bomo elalubaso, agai dage bugagia tonaluyu, dage me tulalugobeo. Tama agai dage tau siyu, tama dage dwai se me isiꝋwai, dwagi yai homu pemene mu eyu, tama agai dage aga moni ula elaluyu gegemani ebo madigi teba sela pabo usu yaibao. ²⁵Tama God agaduba deli naga bidibo dao. Agai da tau siyu ma dobola somainogo, tama agai dago Genuai Bidi Jisas Kraiss e toꝋba tagala palali. Tama tibaso, dago Godigo nogi ugwaba sinao. Awe, tama tiyu, God aga polalubo tuni bidi bidimainao, tama aga genuai bomu mu dali, agai moni ula dali si elalubaso, tama dago aga nogi ugwaba sinao. Te tigidali sogo polobadu aga tama bidai, te megi me aga tama bidibao, te tigidali sogo nosali God aga tama bidada peyu, bidada paibao. Te po mu po dao. Tama dao.